



# Synfocity = 516

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

4<sup>th</sup> December, 2014

## □ SEC 253 & 254 a thu

Mizoram Synod Executive Committee vawi 253-na chu nimin (Nov. 3, 2014) khan Synod Office-a J.M. Lloyd Hall-ah a thu a, vawiin (Nov. 4, 2014) hian a vawi 254-nain a chhonzawm nghal a ni.

Committee hi Rev. K. Lalhmuchhuaka, Synod Moderator-in a kaihrui a, nimin lamah khan Synod Coordinator pension-a chhuak tur post ruak hnawh khah dan tur te, Mobile phone-a dah theih tur Kristian Hlabu siam thu te, Ramthar Commission leh a rawngbawl dan tur hmahlir chungchang te, Ram inthleng thu leh Board hrang hrang atanga thu lutte ngaihtuah a ni.

Vawiin (Nov. 4, 2014) hian Additional Budget chungchang leh kum 2015 Synod Budget te thlirin Synod Inkhawmpuia thlen turin an pawm bawk. Tun tum SEC-ah hian New Delhi-a Kalkaji area-a in, square metre 167.22-a zau, chhawng ngaa sang chu Pastoral Budget atanga a man zaa 30 leh Mission Budget atanga zaa 70 intum tawma lei fel a nih thu tar lan a ni. SEC thut khawm hi vawiin chhun dar 12:30 khan tuang takin zawh fel a ni.

## □ PHBS Graduation Day vawi 54-na

December 2, 2014 chawhnu dar 1 khan Synod Conference Centre-ah Presbyterian Hindi Bible School (PHBS) chuan Batch 54-na pualin Graduation Day an hmang.

Graduation Day Programme hi Rev. Lalchuanmawia, Mission Board Secretary-in a kaihrui a, Rev. K. Lalthlanpuia, Director, Masihi Sangati Kendra-in inhmehriattirna hun a hman zawhin thlahna thilpek hlanna hun hman a ni a, Upa Lalrinmuana, Mission Board Coordinator-in Reports a pe bawk.

Pi Lalruatthangi, PHBS Teacher-in result a puang a, Rev. Vanlabela, PHBS Teacher & Member, Synod Mission Board-in Certificate a sem a, Rev. K. Lalhmuchhuaka, Synod Moderator-in fuihna thuchah a sawi. Upa Dr. H. Lallenmawia, Luangmual West-in zir chhuakte a tawngtaisak a, Rev. John Sharma, PHBS Principal-in lawmthu a sawi zawhin chairman-in Malsawmna sawiin inkhawm a tin a ni. He Graduation Day-ah hian Aizawl West Area Masihi Sangati Standing Choir te, Mission Veng Masihi Sangati Zaipawl te, Syion Swaram te an zai a, zirlaiten Special Item an nei bawk.

Presbyterian Hindi Bible School hi kum 24 zet a lo kal tawh a, August 24, 1990-ah khan hawn a ni. A tir atangin Hindi Bible School tih a ni a, kum 2009 atangin Presbyterian Hindi Bible School tih a ni ta a ni. Tun thleng hian he school-a zirlai awm tawh zat chu mipa 1102 leh hmeichhia 269, an vaiin 1371 an ni a, chung zing atang chuan mi 1328 zetin an zir chhuak tawh a ni. Tuna thlah tak Batch 54-naah hian Mizoram atangin zirlai 7 awmin a bak zawng chu Zoram pawn state 10 atanga lo kal an ni a, an vaiin 34 an ni.

## □ Obituary : Rev. Biaksanga (Kum 90)

Rev. Biaksanga, kum 90 (Pensioner), Sairang Venglai chu tukin (Dec. 4, 2014) zing dar 4:25 khan awmlaiin a thi. Aruang hi vawiin chawhnu dar 1:00 khan Rev. P.C. Pachhunga, Executive Secretary-in Sairang Kohhran Biak Inah a vui a, Upa Vanengliana, Synod Statistician in Rev. Biaksanga chanchin a sawi a, Sairang Pastor Bial Zaipawl leh Sairang Kohhran Zaipawlten hla an rem a, Rev. H. Remthanga, Mission Vengin tawngtaisakna hun a hmang a, Rev. K. Lungmuana, Mission Vengthlangin malsawmna sawiin inkhawm a tin a ni.

Rev. Biaksanga hi Chalhrangi nen innein fa paruk an nei a, a naupang berin a boralsan tawh a ni. Kum 1960-ah Pro. Pastor hna Chalrangah a thawk tan a. 1961 December thlaah Mission Veng Biak Inah Synod-in Pastor atan a nemnghet a, Chalrang Bial bawk enkawl tura dah a ni a, kum 1980 atangin Sairang Bial a enkawl leh a, kum 1986-a a pension hnuah kum khat rawih nawn niin kum 1987 khan a pension a, Sairangah hian a a khawsa zui ta a ni. A rawngbawl chhungin nupa tuak 427 a inneihtir a, mi 4368 Baptisma a chantir bawk. A rawngbawl chhungin hriseh lohna avanga Bial enkawl theih loh a nei ngai lo a ni.

Rev. Biaksanga hi mi inngaitlawm, mahni aia mi dang tha zawka ngai mi a ni a. Mi mal nunah leh rawngbawl na kawnga 'Pathianin min ngaihtuah mai ang' ti tlat mi a ni a. Pathian thu a zir dawn pawh hian a nu leh pa leh a unaute enkawltu tur dang an awm lo chung pawha Pathian kuta innghat tlat a ni.

Ramthar rawngbawl na ngai pawimawh mi a ni a, thlarau boral tur chhandam hi Lal Isua rawn kal chhan a nih anga mi tinin chu rawngbawl hna chu kan thawh theuh tur a ni a, chu chu kohhran hnapi ber pawh a ni, hemi tihlawhtling tur hian mahni inpek te, tawngtai leh thilpek tea tang tur kan ni tih hi a thuchah ngaih pawimawh a ni fo thin.

Ramthar rawngbawl na, Chanchin Tha hril hna thawk nasa kohhran chu tisa leh thlarauvah an ngheet a, mi mal leh chhungkuaah pawh an hmuingil deuh thin ni tein a hre thin. Hei hian kohhran leh ram tan pawh malsawmna nasa tak a thlen thei tih hi a ring ngheet tlat a ni.

## □ Synod Inkhawmpui vawi 91-na tan dawn

Synod Inkhawmpui vawi 91-na chu December 9 - 14, 2014 chhung hian Mission Vengthlang Kohhran Biak Inah neih a ni dawn a, hemi hma hian Committee hrang hrang an thukhawm chho mek bawk.

Kumin Synod Inkhawmpui thlarau lam thupui hi 'Rinawmna' (Sam 37:3) a ni a, December 13, 2014 (Inrinni) zana Rev. Zosangliana Colney-in thlarau lam thupui hmang hian Pathian Thuchah a sawi ang. Kumin 2014 Synod Inkhawmpuia Synod Puipa turte chu :

Moderator	:	Rev. Lalrinmawia
Secretaries	:	Upa H. Zoliana (Sr.) Rev. B. Sangthanga (Jr.)
Finance Officers	:	Rev. Lalramliana Pachuau Rev. Dr. R. Lalbiakmawia
Statistician	:	Upa Vanengliana
Executive Secretaries	:	Rev. Lalzuithanga Rev. P.C. Pachhunga

te an ni.

Synod Inkhawmpui hi kum 2010 atang khan Bial-in an thleng tan a, kum 2010 - ah Dawrpui Pastor Bialin Zarkawt Kohhranah thlengin kum 2011 khan Khatla Bialin Khatla Kohhranah an thleng a, kum 2012 khan Chanmari Bialin Chanmari Kohhranah an thleng leh a, kum 2013 khan Ramhlun North Bialin Ramhlun North Kohhranah an thleng a, kumin (2014) hian Mission Vengthlang Bialin Mission Vengthlang Kohhranah an thleng dawn a ni. *Contd...*

☐ **Kohler Hruaina Eng Quiz zawh a ni ta**

October 14, 2014 zan atanga Synod Information & Publicity (Synfo) buatsaih Kohler Power Systems Hruaina Eng Quiz chu November 28, 2014 zan dar 7:30 khan Top 3 ten Final Round inelna an nei a, result puan leh lawmman semna neiin kharna hun hman nghal a ni.

November 20 & 21, 2014 khan Top 10 ten inelna an nei a, chung zing atang chuan Durtlang Branch, ITI Vengchhak Branch leh Zarkawt Branch ten Final Round hi an lut a, Final Round thleng zo lo Branch 7 te hnenah Consolation Prize Rs. 1,000/- leh Citation hlan an ni. November 28, 2014 zan khan Top 3 ten inelna nei lehin an result hetiang a ni :

Pakhatna : Zarkawt Branch

Pahnihna : ITI Vengchhak Branch

Pathumna : Durtlang Branch

Final Round-ah hian Luka, Kohhran Chanchin, KTP, G.K, Audio & Visual Round leh in lam (Home Branch) atanga member te lo chhan ve tur zawhna pahnih Luka Bu atangin zawh leh a ni.

Kohler Hruaina Eng Quiz hi Aizawl khawpui Presbytery huam chhunga Branch KTP te puala buatsaih a ni a, Branch 82 lai an tel a ni. Quiz titha lawmmanah hian pakhatnain Rs. 1,00,000/-, Citation & Trophy, pahnihnain Rs.70,000/-, Citation & Trophy leh pathumnain Rs. 50,000/-, Citation & Trohy an dawng a ni.

Result puan hma hian Rev. Lalramliana Pachuau, Executive Secretary i/c Synfo in quiz buatsaih a nih dan report a pe a, result puan nghal a ni. Pathumna lawmman hi Upa F. Lalsangliana, Synfo Committee Member-in a hlan a, pahnihna hi Rev. P.C. Pachhunga, Executive Secretary i/c Mission in a hlan a, pakhatna hi Rev. Lalzuihang, Senior Executive Secretary in a hlan a ni. Lawmman sem zawh hian Rev. R. Lalchangliana, Director, Revival Department in malsawmnain Kohler Hruaina Eng Quiz hi a khar a ni.

He quiz sponsor-tute chu Kohler Power Systems, Lower Zarkawt (Main Sponsor); E.R. Enterprises, Ramhlun South; Highland Chevrolet, Zemabawk; Computer House & Photo House, Millennium Centre; Electrical Inspectorate, P & E Department, Zuangtui; Zoland Electronics, Chanmari leh Dyna Roof, Guwahati te an ni a, Trophy hi GlassStop, Peter Street, Aizawl-in a thawnin an tum sak bawk a ni.

Kohler Power Systems Hruaina Eng Quiz hi show neih apiangin Hruaina Eng Channel (LPS & Zonet Cable TV)-ah Live in pekchhuah thin a ni.

☐ **Central KTP-in PRAISE '14 buatsaih dawn**

KTP General Conference thurel "Thalai zawkte hip khawm thei programme siam ni rawh se" tih bawhzui nan Central KTP chuan December 5, 2014 (Zirtawpni) zan 6:00 hian Pathian fak leh chawimawina hunpui PRAISE 14 Rajiv Gandhi Stadium, Mualpuiah a buatsaih dawn a, fakna hla ngaihthlak tur te, lemchan leh lam en tur te a awm dawn bakah Central KTP Leader Rev. J. Lalremsiaman Krismas thuchah a sawi ang. Heng bakah hian Pathian fak leh chawimawina hun a tam thei ang hman a ni ang. Tin thalai Pathian thu a tuihal kawm turin Counselling Cell siam a ni a, Counsellor 40 duty tura beisei a ni. Hetiang thalai nun siamtha duh kawmte hi Central KTP chuan a tul ang a bawhzui zel turin ruahmanna a siam a ni. He programme-ah chhim tur hian thalaite beisei an nih rualin nu leh pa naupang thlengin tel theih a ni.

Central KTP chuan he programme a kal tur zawng zawngte chuan uluk tak leh a hmun hma fai taka vawng turin a beisei a. Central KTP Committee chuan a hmun hma te tha taka vawn a nih theih nan KTP Branch hrang hrang atangin duty tur mi 700 vel a ruat nghe nghe a ni.

Hemi zan programme a kal tur te kal dan turah a felfai zawk theih nan Aizawl Traffic SP hovin hetiang hian ruahmanna siam a ni :

- a. Chanmari atanga hmar lam zawng ten Falkland atangin world bank kawngah kalin Mualpui pan tur.
- b. Zarkawt leh Sikulpuikawn inkar te tan Treasury leh Upper Republic atanga kal tur a ni.
- c. Mission Veng atanga chhimlam tan- LMV leh two wheler te chu Venghnuai-Salem road atanga kal tur a ni a. Branch Bus a kal te chu Treasury/Upper Republic atanga kal tur.
- d. Salem-Venghnuai road hi tlai dar 4:30 atang chuan chho zawng kal phal a ni lo ang.
- e. Saikhamakawn chhim lam zawng chu World Bank Road (Zampuimanga Lungphun) atanga kal tur a ni.
- f. Bus hmang tur Branch-te chuan mahni bus hmaah langsar takin Branch hming tarlan ni thei se.

☐ **Bible Sunday**

December 7, 2014 (Pathianni) hi Bible Sunday a ni a, Bible Society of India (BSI) zawmtu Kohhran hrang hrangten hemi pual hian programme an hmang ang. Presbyterian Kohhran chuan kum dang ang bawkin thupui pahnih a siam a, Kohhran thenkhat tum hnih programme siam theite tan ruahman a ni. Inkhawm tum khat hmangte tan chuan thupui duh zawk zawk thlan mai tur a ni. Bible Society puala thilpek lak khawm tur a ni a, Tualchung BSI Local Committee-ah emaw Branch Treasurer hnenah theh luh tur a ni.

Kumin Bible Sunday thupui turte chu -

- ♦ Pathian Thu - Nun kawng hruaitu tha (Sam 19:7; 119:105)
- ♦ Pathian Thu hrilh leh zawm (Mt. 7:24-27; Lk 11:27-28; Jak 1:22-25)

☐ **Synod Mission Board**

♦ **Tripura Mission Field ringthar neih tum khum** : Tripura Mission Field chuan kum 2014 atan ringthar 1600 neih an tum (target) a. January - November thlengin ringthar 1703 lai an nei tawh a ni.

♦ **Winchester sikul naupang baptisma chang** : November 30, 2014 (Pathianni) khan Kahrawt Biak In-ah Winchester sikul naupang pakua (9) te chu Pastor Lalhriatpuia'n baptisma a chantir. Kumin chhungin Kahrawt Bial chhungah ringthar 77 an neihna a ni.

♦ **Tuikual Bial Masihi Sangati** : Tuikual Bial Masihi Sangati chuan December 2-4-9, 2014 hian zan dar 8:00-ah tanin Tuikual - Tuikual 'S' - Tuikual 'N' Kohhran huam chhungah Pathian thuchah puang chhuakin hun an hmang. Thuriltu atan Pu R.Lalchhanhima hman a ni a, Bial Masihi Sangati Member atang pawhin a remchangin an sawi a, Bial Masihi Sangati Zaipawl an zai thin bawk.

♦ **Missionary la thar** : Synod Mission Board chuan kum 2015 chung missionary atan vawiin (Nov. 4, 2014) khan waiting list atangin Mary Lalrintlaki (GNM) D/o Upa F. Lalbula, Suangpuilawn a la thar a, Baruatilla, Cachar Tlangah Staff Nurse hna a thawk ang.

☐ **Hruaina Eng FM Radio & TV Programme**

♦ **DECEMBER 5 (FM Zoawi Aizawl @ 7:30 p.m.)**

**Solo** : B-Tea - Krismas, **Zaipawl** : Bethlehem Pastor Bial Zaipawl - Van Lal nau chu piang ve se, **Thusawi** : Upa B. Lalhmunliana - Engtin nge krismas kan hman ang, **Solo** : Zoramchhani - Bethlehem arsi engmawi, **Zaipawl** : Gospel Melodious Choir - Eden parmawi chulhnu

♦ **DECEMBER 5 (FM Lunglei @ 7:30 p.m.)**

**Solo** : B-Tea - Krismas, **Zaipawl** : Bethlehem Pastor Bial Zaipawl - Van Lal nau chu piang ve se, **Thusawi** : Upa B. Lalhmunliana - Engtin nge krismas kan hman ang, **Solo** : Zoramchhani - Bethlehem arsi engmawi, **Zaipawl** : Gospel Melodious Choir - Eden parmawi chulhnu

♦ **DECEMBER 7 (TV Programme @ 3:00 p.m.) :**

**Sermon** : Rev. Vanlalbela - Bible Sunday Thuchah, **Naupang Pual** : Naupang Chawhnu Inkhawm, Bethlehem Kohhran, **Film** : Mary Jones

□ **Susamachar Prasaran Programme**

**DECEMBER 7 (Pathianni) 5:00 pm. Hindi Gospel Programme (Susamachar Prasaran) :**

**Group/Choir/Solo** : Karbi Presbytery Choir - O Jisu, **Group/Choir/Solo** : Sihphir Masihi Sangati - Tere saath ham cheln, **Sermon** : Rev. Mohanlal Tudu - Yishu papiong Ko Bachane, **Group/Choir/Solo** : Vaivakawn Kohhran - Jay Jay Prabhu, **Group/Choir/Solo** : LH Hindi School - Yeshu MASHI

**ADVERTISEMENT**

John Williams Hospital, Lungleia thawk turin a hnuacia hna hrang hrang te hi lak tum a ni a. Pathian rawngbawl tura inpe duh, kum 18-35 inkar tan a hnuacia hming ziak hnenah hian December 30, 2014 thleng dil theih a ni a, dilna hi plain paper-a ziah tur a ni. Diltu chuan thiamna Certificate leh Kohhran lehkha thil tel tur a ni. Hlawh chu Synod Pay Scale anga pek tur a ni. January 15, 2015 (Ningani) dar 10:00 am-ah JM Lloyd Hall, Synod Office, Aizawlah Screening Test neih tur a ni.

S.no	Hna hming	Post awm zat	Minimum Qualification
1.	Medical Officer	1	MBBS of any recognised University
2.	Staff Nurse	4	GNM of any recognised Board/Institution
3.	Pharmacist	1	D.Pharm from any recognised university
4.	Lab Technician	2	Diploma in Medical Laboratory Technology from recognised university
5.	X-ray Technician	1	Diploma in Medical Radiation Technology from recognised university
6.	Office Assistant	1	HSLC of any recognised Board
7.	IV Grade	3	Class VIII Certificate holder

Sd/- Director  
Synod Hospital

**ADVERTISEMENT**

Synod Hospital, Durtlang-a thawk turin a hnuacia hna hrang hrangte hi lak tum a ni. Pathian rawngbawl tura inpe duh, Kum 18-35 inkar tan a hnuacia hming ziak hnenah hian 30.12.2014 thleng dil theih a ni a, dilna hi plain paper-a ziah tur a ni. Diltu chuan thiamna certificate leh Kohhran lehkha thil tel tur a ni. Hlawh chu Synod pay scale anga pek tur a ni. Ni 22.1.2015 (Ningani) dar 10:00 am-ah Synod Hospital, Durtlang-ah interview tur a ni.

Accountant hna dilte tan 8.1.2015 (Thursday) dar 11:00 am-ah Synod Hospital Auditorium, Durtlang-ah Screening Test neih tur a ni a ni.

S.no	Hna hming	Post awm zat	Minimum Qualification
1.	Specialist Doctor	2	1) MD (General Medicine) 2) MS (General Surgery)
2.	Medical Office	3	MBBS of any recognised University
3.	Accountant	1	Commerce Graduate of any recognised University with Accountancy (Major)
4.	Audiometrician	1	Bachelor of Audiology and Speech Language Pathology (BASLP) from any recognised institution
5.	Operation theater Attendant	3	Class VIII Certificate holder
6.	Mid Level Ophthalmic Attendant	2	Class VIII Certificate holder
7.	Orthopaedic Attendant	2	Class VIII Certificate holder
8.	Carpenter	1	Class VIII Certificate holder

Sd/- Director  
Synod Hospital

**SYNOD MULTIPURPOSE TRAINING CENTRE ADVERTISEMENT**

Synod Multipurpose Training Centre, Mission Vengthlang, Aizawl-ah a hnuacia Trade tarlan ang hian training-na hawn leh a ni dawn a. A dil duh chuan a hnuacia hming ziak hnenah hian Kohhran lehkha leh thiamna thil telin dilna thehluh theih a ni.

**1. Certificate in Computer Application (CCA)**

- ⌚ Dil theih hun chung : 14.1.2015 thleng
- ⌚ Screening Test neih hun : 15.1.2015 (10:30 a.m)
- ⌚ Interview hun : 16.1.2015 (10:30 a.m)
- ⌚ Dil thei chin : HSLC Passed

**2.Pheikhawh siam**

- ⌚ Dil theih hun chung : 14.1.2015 thleng
- ⌚ Interview hun : 16.1.2015 (10:30 a.m)
- ⌚ A duh apiang tan dil theih a ni.

Sd/-  
**REV. ZOSANGLIANA COLNEY**  
Programme Director,  
Synod Multipurpose Training Centre

